



HISTORIARUM VENETARUM ANDREAE MAUROCENI LIBER DECIMUSSEPTIMUS.



IN extrema fere operosi hujusce laboris parte id præfari liceat, quod initio, dum manum huic scriptioni admoverem, dixisse memini; procul ira, amore, odio, quæ postremis hisce temporibus contigere, me literis mandaturum. De acerrimis inter Paulum quintum Pontificem Maximum ac Venetos diffidiis scripturum, nullus me a veritate promenda affectus abducet; non acres controversiæ agitatae, quibus vel in Patrum collegio, vel in Senatu interfui; non inexpectato ejaculatum in Rempublicam fulmen; non denique infusus amor in patriam a munere suscepto avocabunt. De iis, inquam, diffidiis, quæ ex parvis orta initiis, adeo se extulerunt, ut per Italiam atque Europam omnem pervagata, ex scriptorum contentione in cruentum fere bellum, quo publica quies, reipublicæ christianæ status. religio denique ipsa

1605

in